

四庫全書

子部

欽定四庫全書

子部

居易錄卷三十一

詳校官侍讀<sub>臣</sub>陳崇本

員外郎<sub>臣</sub>牛稔文覆勘

總校官中書<sub>臣</sub>朱 鈐

校對官中書<sub>臣</sub>方大川

謄錄舉人<sub>臣</sub>徐 瑤

欽定四庫全書

居易錄卷三十一

刑部尚書王士禎撰

金陵李氏有酒樓臨市一日有道士十八人來樓上食畢覆其椀而去椀下各遺一方治諸疾病主人秘之扁置箱篋數日啟篋則不存矣方懊恨明年盆中牡丹花開十八枝每枝花上各有一方如前似金書者驚喜而錄藏之製丸散活人多奇効金陵人傳牡丹十八方是也

江寧有蕭生者食香蕈則死又有王生者飲茶則死必  
二三日始甦醫無能識其故者誌于此俟明醫或能知  
之

五月十七日

聖駕還京內閣九卿諸臣迎于通州

以前左都御史王鴻緒為工部尚書

賜致仕工部尚書熊一瀟

御書曰怡情泉石致仕內閣學士徐嘉炎

御書曰直西清又一聯云樹影不隨明月去溪聲長送落花來又

御書唐人張旭隱隱飛橋隔野烟絕句詩一首

李容齋

天

相國壬戌典會試得士最盛予孚青先以已

未進士入翰林一日宴集諸門生史講學愛獻詩有云  
郎君館閣稱前輩弟子門牆半列卿時以為不減唐人  
文章舊價留鸞掖桃李新陰在鯉庭之句

上幸江浙

賜扈從在籍督撫提鎮藩臬諸臣

御筆頗多給假吏部侍郎彭孫適曰松桂堂檢討尤侗  
曰鶴棲堂御史盛符升曰年登耄耋時侗年八十二符  
升予門人年八十五矣會

萬壽節駐蹕吳門而諸臣得邀

天藻真曠世奇遇也他未及錄

五月二十三日臣左都御史王士禎

內直南書房蒙

恩賜

御書素縑一幅云瞳瞳曙色上帆檣野水波添滿路光  
知是皇畿程日近林風吹送奈花香蓋舟行

御製近詩也有

御璽三曰佩文齋曰康熙御筆曰萬幾餘暇

六月二十日

內直蒙

恩再

賜

御書大字一聯云煙霞盡入新詩卷郭邑閒開古畫圖  
御璽三曰佩文齋曰康熙御筆曰保合太和同蒙

賜者戶部尚書陳廷敬禮部尚書張英工部尚書王鴻  
緒

戶部左侍郎王揆調吏部右侍郎仍兼翰林院學士

吏部

左侍郎趙士麟卒于位

特諭起原任左都御史郭琇為湖廣總督以兵部右侍



郎兼都察院副都御史

上南巡過吳江縣詢知琇為令時清廉愛民故有是

命

刑部左侍郎田雯調戶部右侍郎總督湖廣兵部右侍郎李輝祖入為刑部右侍郎

漢書大司徒馬宮本姓馬矢宮仕學改稱馬馬矢姓甚奇王弼州宛委餘編曾載之複姓

宣和書譜云桓溫生未晷溫嶠見之云此兒有奇骨因

以溫名之如所云為太真之辱矣

書譜杜光庭傳撰高士傳百卷今其書不傳然古來高士滅景雲棲安得有百卷之多使麒麟鳳凰與牛馬鴉鵲肩隨踵接何足貴耶

己卯六月漢軍御史郭金城疏請裁中外冗官下九卿議疏內亦及都察院官予時掌院事會議日昌言于衆曰御史為

朝廷耳目之官有彈劾之責所云猛虎在山藜藿不採

關繫言路豈同閑散况明時兩臺設御史至百二十員  
本朝初裁其半再裁留四十員又裁僅留二十四員雖  
巡按停差而現存之差有六掌道六協理稽查六部京  
畿道寶泉寶源兩局登聞鼓五巡城六巡鹽等差以及  
大祭祀

大朝會監禮監宰糾儀侍班鄉會試內外監試諸差往  
往乏人余尚欲請增數員庶幾脩官無曠詎可裁乎滿  
太宰庫勒納公見予言之侃侃遂首肯惟漢軍御史八

員中留其五巡視五城餘三員裁去并裁漢軍都事一員而他御史如故尋奉

旨如議時裁去通政司漢叅議二員大理寺漢寺丞一員春坊漢中允贊善各一員漢行人四員

上駐蹕江寧

御書治隆唐宋殿額遣皇子直誠兩郡王賁懸明太祖孝陵踰日

駕幸鍾山躬祭

上親祭明祖孝陵至是而三矣

楊慎藥市賦人參三椹來自高句驪之國桃枝九折出于嵩昆明之陬

丹鉛錄浯水有南浯北浯北浯在琅邪靈門南浯在零陵九疑按北浯在今青州之安邱縣南浯即元結之浯溪

七月命兵部尚書席爾達署川陝總督事

吳赫解任

以都察

院左都御史馬爾漢署兵部尚書事

七月二十日

御前發下元人陳桎手錄賦題備忘十五卷蓋備場屋

之用者有嘉靖六年丁亥石東居士跋略云子經

桎字無

子其遺書皆歸外孫古氏古氏自四明徙居餘杭

以翰林院編修阿金為福建正主考滿保為浙江副主

考喀爾喀為河南副主考法保為陝西副主考滿洲翰

林官出典鄉試自今科始

阿金喀爾喀予辛未科所取士也

達賴喇嘛進表其頌

聖稱總統天下率土威福文殊菩薩

至聖皇帝手執蓮花清淨座下又稱

壽與天同至聖天朝皇帝大護法主又稱

壽與天同並日月大護法主人

以內閣學士嚮禮為巡撫山西都察院副都御史

巡撫  
陳倫

罷

七月二十三日進呈編次

上諭皇太子塞外用兵機宜蒙降

御筆云善用兵者役不重興糧不三載故師不久暴而天誅亟決下注漢書二字

宸翰用硃書結構精密道緊蓋引馮奉世傳中語仰瞻歎美者久之時同被

旨者戶書

臣

廷敬禮書

臣英工書

臣

鴻緒暨左都

臣士

禎

特俞巡視兩淮御史卓琳疏請蠲免白駒等十四場三十七八兩年竈戶折價銀三萬三千六百兩有奇



朱檢討竹垞書來寄所著經義存亡考十六卷云此書已成凡三百卷今所寄者纔連山歸藏周易止於北宋則全書之浩博可知已

已卯閏七月十三日門人莊戶部廷偉攜宋搨虞永興夫子廟堂碑來觀古色鬱然的是舊物是唐荆川家藏本末有董思白贗書一跋反成蛇足耳

又趙子昂絹書草訣歌一卷疎密斜整有不衫不履之態末自跋云世有草書訣本非善草書者所作故多謬

然初學便於誦習兼其間亦有可取者故戲書一過以  
質子久松雪翁

又唐六如畫溫公獨樂園凡七圖曰讀書堂弄水軒釣  
魚菴種竹齋采藥圃澆花亭見山臺自署正德庚辰春  
三月上已畫於桃花塢夢墨亭中泉石竹樹秀絕軼塵  
每幅有文徵仲題五言詩末有徵仲書獨樂園記跋云  
余觀子畏獨樂園圖徵明十年前所書不意復覩於江  
陰黃吉甫家今日多在病鄉精神稍減乘興重錄此記

于後書罷不勝慨然衡山居士記書尤佳

閏七月十五日以河魚腹疾未入直是日蒙

賜南書房諸臣人

御書二幅內臣以臣士禎偶病未入直復

命明日啟

奏奉

旨今日事多未暇回時補

賜時將以十七日哨鹿塞外也

十六日

上以

御製廣濟寺碑文

賜觀字方圓徑寸適美妍妙絕似虞永興末署皇三子  
多羅誠郡王肩祉奉

敕書

上好書學

宸翰集帝王之大成乃東宮暨諸皇子皆工於書法

如此

本朝家法真唐宋明以來僅見之盛事也

蒙發下宋高宗書千文二本

賜觀皆署紹興二十三年歲次癸酉二月二十三日御書院書其一頗似聖教序其一似雙鉤廓填者

閏七月十七日

駕幸古北口

命吏部尚書熊賜履禮部尚書張英侍東宮日講周

易

巡撫貴州副都御史王燕疏稱安順府鎮寧州儒士曹  
邦傑幼習詩書長諳經史以康熙三十七年三月云亡  
其妻張氏出自儒家婦道既修文理亦繕結禱二載遽  
天所天作文告祭誓必身殉當即焚邦傑遺稿而自經  
于柩側從容激烈出于自然取義成仁允堪不愧云云  
疏末載祭夫文曰嗚呼痛妾命之不辰也幼失嚴慈撫  
育無人形影伶仃莫可言狀幸得于歸夫子庶幾夙夜

事之百年守之憶吾父擇壻時亦曰吾女幸矣終身之  
仰望者非壻耶如賓如友同心而同德者非壻耶私心  
自慶在妾尤深孰意甫歸故里遽嬰疾疾妾向之喜者  
化而為憂餐忘寢廢祈以身代而天不假年黃梁一覺  
羽化昇矣傷心哉夫子之人如金如玉夫子之丈如潮  
如海而今已矣不可復見矣天耶人耶孰為之耶禮稱  
未亡人妾不忍未亡也詩云之死矢靡他妾唯知之死  
也九泉匪遠妾必從之嗚呼淒淒惻惻踽踽涼涼拊膺

呼號瞻望無將臨風灑涕對景悲愴削骨代筆曷罄衷  
腸夫子乎其知之乎何不臚輪少待使妾欲追而難跡  
乎靈其不昧庶鑒妾心邦傑以三月二十三日卒張氏  
以二十五日殉年二十七

蘭于花品中最清幽而其根能殺人後魏人乃有名魏  
蘭根者取義亦不典矣

先始祖母初夫人為天風吹來事載家乘萬厯間伍寧  
芳表學憲記之頗得其實而賀燦然駁之以為語怪非



也謝在杭

肇

五雜俎亦載此事云國初歷城王氏方鰥

居一日大風晦冥良久既霽於塵岔中得一好女子年  
十八九云外國人也乘車遇風歟然飄墮遂為夫婦今  
王氏百年科名貴盛無比皆夫女之後也蓋傳聞異辭  
曰歷城王氏曰外國人皆謠也

五雜俎云八月望有月華或言夜半或言微雨後或言  
凡秋夜之望皆有之五彩鮮明旁照數十丈如金線者  
百餘道或言但紅雲圍繞之而已康熙己未庚申間先

司徒府君以中秋夜召客客散留徐隱君東癡

夜宿而

府君獨坐月中徘徊未寢漏下三鼓忽見月華如前所  
云五采金光灼爍射人不可名狀急呼隱君起重命觴  
酌達旦明日隱君賦月華篇紀事載新志中

華山經云羅隱之新淦玉笥山道士來居華山一觴一  
詠高情自適晉天福中賜號曰希夷先生稍在陳搏之  
前是五代有兩希夷皆居華山也

夫子今濟南長山縣也見左氏傳

胡應麟元瑞詩藪云晏同叔冰從太液池邊動柳向靈和殿裏看靈和字僻又與柳不切易作長楊按靈和乃張緒事何得謂僻而不切元瑞號博雅豈南史亦未之讀耶

九月初七日秋審畢九卿會稿中有河南司閔煥山西司郭振羽廣西司竇子雲三起初擬情真余謂凡以救父罹罪者多議矜減此三人雖以刃然止當論其救父與否不必分挺刃也愚意緩決為當諸公以為然皆改

緩決

以左僉都御史王紳為大理寺卿

大理卿  
李錦罷

少詹事王九

齡為都察院左僉都御史

以翰林院檢討劉涵為揚州府知府先是己巳以翰林

丁廷健為鳳陽府知府李濤為臨江府知府汪楫為河

南府知府至是以副都御史吳涵請疏通翰林官故再

有是

命

九月二十一日巳時

文華殿經筵講官吏部尚書庫勒訥熊賜履講大學是  
故君子有大道必忠信以得之驕泰以失之三句禮部  
尚書張英掌翰林院禮部侍郎阿山講易經繫辭仰則  
觀象於天俯則取法於地二句講畢

賜宴太和門

今桐城相國張公英為諭德時以詩集屬予評次予見  
其梅花詩有云嘉名他日傳調鼎記取蟠根在草茅曰

宰相語也今果驗常熟歸少詹

允肅

丙辰落第後居京師

每徒步袖詩相質予見其和平恬澹絕無憤懣叫號之氣歸故善楷法予謂之曰君必狀元及第已未果傳臚第一人詩為心聲諒矣

東陽縣資福寺唐刹也宋宣和中燼于火藏經皆化為石卷軸宛然扣之有聲事載本誌

張氏潛江人能詩有絕句云病廢機梭老廢蠶牙籤綑帙興猶耽唐詩元曲都收捲日向紗窓讀二南詠留侯

云子房稱病藏機早只待功成辭漢家已復韓讎無所  
事此心元自在煙霞

康熙十年潛江民吳某家屋上墜下一物形如龜有兩  
翅頭有一角四足如人指色如羊肝以刀刺之不能入  
其殼非骨非肉聲如雄鴨

九月二十七日

南書房觀唐文皇屏風帖有揭傒斯虞集諸跋雖非真  
跡而臨摹甚工亦高手也

調工部左侍郎李枏為戶部右侍郎

戶侍錢三錫卒

以左副都

御史吳涵為工部右侍郎大理寺卿王紳為副都御史

太常寺卿高喬為大理寺卿少詹事李鎰為太常寺卿

十月初一日

上躬祀

太廟

十月十六日武英殿大學士兼吏部尚書李天馥卒

賜諡文定



十一月初一日

上躬祀

天子南郊

初五日以戶部尚書馬齊禮部尚書佛倫為大學士馬  
齊武英殿佛倫文淵閣吏部尚書熊賜履禮部尚書張  
英皆大學士賜履東閣英文華殿各兼本部尚書馬齊  
仍掌戶部以戶部尚書陳廷敬為吏部尚書刑部尚書  
李振裕為戶部尚書兵部尚書席爾達杜臻皆禮部尚

書都察院左都御史馬爾漢原任總督兩江兵部尚書  
范承勲皆兵部尚書都察院左都御史王士禎刑部尚  
書原任左都御史哈雅爾圖吏部左侍郎兼翰林院學  
士王澤宏皆左都御史

上親征額魯特

御製前後出塞詩氣象高渾非貞觀開元所及略就記  
憶者載于此彈琴峽云崢嶸流水意彷彿似鳴琴曲度  
泉歸壑聲兼峽泛吟空山傳逸響終古奏清音不御金

徽久泠泠會素心瀚海云四月天山路今朝瀚海行積  
沙流絕塞落白度連營戰伐因聲罪馳驅為息兵敢云  
黃屋重辛苦事親征賜將士食云萬騎擁雕弓長鳴向  
北風龍荒彌曠遠虎旅正驍雄戰鼓黃雲外旌門紫氣  
中朕躬方蓐食與爾六軍同勦滅噉爾丹大捷云殘寇  
疲宵遁橫衝節制兵我師乘銳氣誰許丐餘生貔虎三  
軍合鯨鯢一戰平愧稱謀畫定討罪荷天成

調禮部右侍郎掌翰林院事韓莢為吏部右侍郎王掞

轉左侍郎皆兼翰林院學士內閣學士李錄予為禮部  
右侍郎兼翰林院學士內閣侍讀學士范承烈為內閣  
學士兼禮部侍郎

會試舊例止分南北中卷康熙辛未科雲貴廣西無中  
式者御史王承祐江蘩因上疏條奏請于南北中卷之  
內再分左右九卿兩議具奏奉

旨著畫一具奏九卿因議以直隸山東為北左河南山  
西陝西為北右江南浙江為南左江西湖廣福建廣東

為南右四川雲南為中左廣西貴州為中右得

旨允行甲戌丁丑遵行兩科闈中但握算左應中若干  
卷右應中若干卷文之佳惡皆不暇論以故真才屈抑  
頗多予為總憲欲疏請復舊例以入直

南書房不果上已卯十一月副都御史梅桐厓錫疏言

之事下禮部部兩議以上復下九卿予時為刑部尚書  
首言會試合天下之人才止當論文不當算各省額數  
之多寡若會試分省定額則鄉試亦應分府定額乎況

科場鉅典當防弊竇既分五經又分南北若再分左右  
恐闌中易于揣摩此又弊竇之當防者也諸公皆以予  
言為然會總憲涓來兄澤宏少宗伯慎菴封滌持後議遂復  
兩議上之

上竟從前議大司空儼齋鴻緒曰始終力主持此事者先  
生一人而已因記本末於此

上諭戶部蠲湖南康熙三十九年地丁錢糧

于氏者東昌清平人于進昌女也字劉興旺之子索成

以家貧養于劉年十四矣將以己卯七月二十七日完  
婚二十二日村中社會興旺暨妻子皆出觀劇女獨處  
閨中有修成者無賴子也傭于其鄰杜誠之家窺女獨  
居持刀窺入脅之女大罵不從成持刀強逼之女以右  
手拒刀幾斷腕罵愈厲成怒且懼其泄也斷其脰而去  
知縣王吉人廉得其實修成具服巡撫王少司馬國上  
其事當修成故殺大辟于氏以貧窶幼女寧死不污貞  
烈可風下禮部建坊旌表予時為刑部尚書歸記之俾

勿湮沒于後

欽差部院大臣十人督修淮揚高家堰邵伯鎮等處河  
工兵部尚書范承勲工部尚書王鴻緒吏部左侍郎王  
揆戶部左侍郎田雯兵部滿右侍郎布顏努刑部右侍  
郎喻成龍工部左侍郎顧藻都察院滿副都御史壽鼎

副都御史王紳大理寺卿高裔

裔丁外  
艱不行

衛中丞既齊字爾錫山西洪洞人醇儒也自翰林檢討  
超拜山東布政使廉聲甚著入為順天府尹擢副都御



史出為貴州巡撫罷歸己卯冬以分理河工入都日在  
邸中召門生黃編修叔琳講中庸一章二鼓始罷其靜  
力如此

前福建巡撫卞中丞令之

永鑒

貽書畫彙考六十卷其自

撰也凡詩文題跋悉載自序云上溯魏晉下迄元明大  
之忠孝之蹟法戒之圖小之文章詞翰江山雲物釐甲  
乙較亥豕當務即休退食復然故所收視雲烟過眼錄  
鐵網珊瑚諸書獨為詳博亦游藝不可少之書也

予昔過長春寺僧院見明慈聖李太后像及田妃寫真  
皆白晳豐美田像稍似怨抑者或是病中所作

禮部題為援例陳請乞

賜襲封以崇先賢以廣皇仁事該臣等會議得先經禮  
部議覆閔煌端木謙請給博士之處無容議具題奉  
旨九卿詹事科道會議具奏欽此仰惟我

皇上治邁千古德冠百王創建無前之盛烈肇舉未有  
之隆規先賢閔損端木賜後裔雖從前並未設有博士

恭遇我

皇上崇儒重道之時兩賢後裔似應授與官職以彰  
皇上之殊恩曠典但後裔歷世久遠伊等是否嫡派應  
行文該撫會同衍聖公確查嫡派將應授之人保送到  
日再議可也奉

俞旨

文衡山方竹枝跋語云余年八十有七矣而背未鮐髮  
未黃燈下猶能為蠅頭書作畫猶能為徑丈勢殊不自

覺其為老也有謔余者曰子多太公之五年少伏生之  
三歲矣余始覺其為老然矍鑠是翁崛強猶昔必不以  
老自衰忽有友人自蜀中來貽我方竹一杖因思解組  
已久非杖朝之時而杖鄉杖國之年又遠過焉欲贈同  
儕而香山社中殊無九老則不如姑存之以俟諸旦夕  
可用之時且以誌良友之嘉惠云爾嘉靖戊午秋八月  
長洲文徵明題

文徵明畫仙山樓閣自題詩云山半崔巍拱絕壁誰開

雙闕峙青雲世人欲識仙凡路霞銜星衢自此分嘉靖  
乙卯二月既望為竹隱作時年八十有六

趙松雪墨菊一幅題云物華有秋菊頗稱傲霜枝不謂  
一莖草具此松栢姿當時染翰者興言可及斯方外史詩  
化染灤京產異花都緣地貴寵優加香同御串應多興  
色比朝衣更有華粉本最宜陶令酒藥苗尤勝陸生茶  
江南處士窺天巧問是吾宗第幾家

闕

山潘迪書

宋人李崧觀潮圖有張仁遠題詩云神鱗怒決滄溟水

浪沸波騰亘天起巨靈擘山山為開王龍捲雪從東來  
腥風撼地坤輿剖長江萬鼓雷霆吼雄威欲吞吳越軍  
強弩三千皆縮手金堤既成事已非錢唐江上開皐畿  
雕闌玉檻照東海貪看秋潮忘黍離中原不復民易主  
百萬貔貅宿沙渚倚樓望潮潮不來六帝同歸一坏土  
人間廢興何代無誰能耽樂思艱虞良工不解寫無逸  
丹青却作觀潮圖

客攜宋搢定武蘭亭序來觀後有元人諸跋真古物也

輒具錄於左方

素弱冠時盡見陳海珠氏所藏蘭亭序諸家石刻六十有三本然於書學要非專門不敢妄加評議此卷敬修父嘗珍襲之必善本也臨川危素唐太宗得禊序真蹟命歐虞褚諸公臨倣之近侍趙模韓道政馮承素諸葛貞輩皆得臨擬取衆所臨分賜諸王近臣惟率更令所臨奪真因勒石以留禁中世共珍異罕獲打搨後雖更亂石獨完存五季時契丹輦以歸

北復道棄之慶厯中李學究得而秘瘞于土至其子始  
出石搨以售人宋景文公守定武購而藏之官庫後守  
薛師正懼搨繁傷石刻別石以徇世求子紹彭又模刻  
它石潛易元刻由是定武變為三刻然唐刻微帶肉此  
本字頗豐必紹彭之所模但墨燥而少潤耳予友敬修  
氏善鑑別尤愛此卷蔡中郎收鑿餘之枯必非妄賞汪  
氏其世寶之至正癸巳長至前五日梅仙山樵卓說  
禊帖自貞觀間臨搨之盛至宋蔡君謨薛紹彭諸公尤



以此為奇事然考其刻則定武本為最先此好古者所以貴得定武刻也景定咸淳間賈氏枋國凡諸舊刻鮮不購入其府客有廖寺丞者嘗承命叅較擇其粹者輯成一帖俾良工王用和刻諸悅生堂經年乃就是則楔帖蓋未易言也此本鐫刻既精打搨尤不苟危雲林所謂敬修父嘗珍襲之必善本也大雅宜謹藏之至正己秋九月十又一日丙寅金華鄭濤書

又觀唐韓滉維摩不二圖南唐周文矩飲中八仙圖宋

人臨顧凱之列女圖

有喬贊成印  
柯氏清玩印

元錢選惜馬圖

富平門人朱樹滋寄舊搨佛遺教經前有釋迦畫像文

嘉休承泥金小字心經前後有周氏家藏張復之印廩

公印項墨林鑒賞印香山之裔印武功小印王元美印

未有王穀祥跋云涪翁云大字無過瘞竊銘小字無過

遺教經近世所傳右軍遺教皆唐經生手書耳陸太宰

所藏舊本為世罕購近日稍稍見之是本亦其流亞也

已未長至日又有玉川子表尊尼跋不錄

同年秀水曾王孫道扶子安世書來求為其父誌墓以  
九成宮圖為贄上方空處有弇州臨九成宮銘畫不書  
款又明人書畫一冊凡二十幅皆莫是龍張鳳翼文  
徵明文彭董其昌項德新輩真蹟極可玩文衡山行  
書紅白梅花梨花等詩前有臣受孔子戒圖印

明左忠毅公光斗視北畿學政有知人鑒凡所題品往  
往奇中人亦不知其何術也試順天日拔故相國史公  
可法為童子之冠史公年少貌又寢謁謝曰左公對衆慰

勉之曰善自愛將來社稷臣也衆出而戲笑之後史公  
果大拜南渡殉國難以死又有保定張某次當貢左公  
謂之曰汝官當至三品然艱于一第奈何後果以貢士  
仕至巡撫

先從兄太液

士鵠

藏倪雲林畫小幅極瀟灑上有自題詩

云瀟瀟風雨麥秋寒把筆臨摹強自寬賴有

閔

君相慰

藉松肪筍脯勸加餐予少時極愛之康熙甲辰在揚州

題程孟陽畫和之矣適觀卞中丞

永鑒

書畫考有王叔明

自題喬松絕壑圖絕句一字不異第三句缺處是俞字  
題下又注云一本作至正十三年二月晦日倪瓚寫題  
詩與此同味此詩風致斷是雲林作然叔明何以勦襲  
不易一字殊不可解也

黃鶴山樵畫款或作王子蒙又或作叔銘

南山之下汧渭之間想見開元天寶年此篇乃坡翁書  
韓幹馬圖作也趙松雪題五代趙巖調馬圖書此詩而  
自跋云以杜子美詩書之王穉登又跋云拾遺集無此

作魏公何從得之古今詞人之作散逸不傳者多寧獨  
此歌而已云云予閱之失笑在子昂或一時誤書百穀豈  
一生未睹蘇集耶何孟浪至是且子美明皇時人安得  
云想見開元天寶耶二公亦未之思耶

雪中偶過卞令之中丞書舍觀李營丘雪景山水及王  
右丞雪溪圖周文矩郭忠恕僧巨然高房山趙松雪管  
夫人黃大癡王叔明吳仲圭倪雲林曹雲西徐幼文張  
伯雨諸名人雜畫至暮又觀元刻松雪集又陸放翁行

書古詩一首云能自得我心無入不自得靈府長優閒  
蕉鹿烏能惑濁醪吞數升浩氣漫漫塞醉來隱几酣屢  
到華胥國人生貴適情何當調語默放翁游作字極矯  
健

太常寺題為遵

旨會議事康熙三十八年十二月十一日奉

旨諭元旦諸臣俱集人衆煩擾請捧

神牌往來朕心殊覺未安着內閣會同內務府禮部太

常寺考明代典禮議奏欽此該臣等考得明代奉先殿  
祭享並無向太廟拊請牌位之儀我

國朝建立

奉先殿于內原安奉

太祖

太宗

世祖神牌朔望薦新等祀以時行禮

四祖神牌原安奉于



太廟後殿每年時享遣官于後殿

四祖神位前致祭且歲暮又有祫祭元旦復請

牌位至

奉先殿合祀似覺禮煩嗣后遇元旦

皇太后聖誕

萬壽聖節於

奉先殿行禮時停其請

太廟後殿

四祖神牌至

奉先殿即于

太廟後殿照

奉先殿典例供帛酒籩豆讀祝文遣官致祭則

四祖牌位不致往來有褻而我

皇上誠敬之心亦允愜矣其祝文交與翰林院撰擬可

也奉

旨是

禮部會九卿題為會試闕天下之人材閱卷宜照從前  
之定例仰請

乾斷酌復成規以光大典事都察院左副都御史梅賾  
題云該臣等會議得會試乃聚天下之人材而拔其尤  
者以光

朝廷賓興大典舊例分南北中卷衡量可謂至平又分  
左右未免分析太繁相應仍照舊例南北卷內不必細  
分左右將廬州等府滁州等州舊係中卷者俱歸于南

卷其雲南貴州四川廣西四省去其中卷名色每科雲南定為雲字號額中二名四川定為川字號額中二名廣西定為廣字號額中一名貴州定為貴字號額中一名康熙三十九年會試奉

恩詔加額明年會試應將雲南四川各加中二名廣西貴州各加中一名庶人材不致淹抑而遠方士子皆得均霑

皇恩矣奉

旨依議

居易錄卷三十一

欽定四庫全書

居易錄卷三十二

刑部尚書王士禎撰

康熙三十九年庚辰正月門人李御史子來

先復

攜示李

在換鵞圖筆意疎放圖中一丈夫相向坐右軍座後一

女子捧硯立對坐一丈夫回顧童子抱鵞至鵞宛頸似

欲鳴者意態生動衣褶飄灑按圖繪寶鑑李在字以政

莆田人遷雲南山水細潤宗郭熙豪放宗夏圭馬遠其

人物評者謂八面生動故四方重之云又元磁碗一視

今磁絕厚素質青花紋皆作盤螭形云是曹縣李襄敏公秉家物自元時先世所傳至襄敏已數世今又三百年矣

正月二十七日

乾清門

御試已卯科順天舉人四書題三道內閣九卿在

懋勤殿閱卷四鼓始出宿館中次日仍召小九卿科道官覆閱



二十九日

駕出由天津水路閱永定河工

二月初三日有

旨欽定覆試順天舉人一等至三等俱准會試四等革  
黜者七人

初五日吏部集議順天考試官同考試官衆問或以磨  
勘疏為主或以覆試為主予謂准舉人會試者

皇上之特恩磨勘處分者科場之定例若因覆試而廢

磨勘恐將來科場之弊益不可問矣滿洲太宰庫勒納  
公深以予言為然議遂定

黃石齋先生蔡夫人名潤石字玉卿工書法與先生逼  
似康熙庚辰春得其楷書律詩一卷楷法稍雜分隸題  
云偶寄夏太守時山中聞警崇禎丙子秋八月蔡氏玉  
卿書於石養山中時多崇禎中魔道語蓋先生作也

庚辰科會試總裁大學士兼刑部尚書吳璥大學士兼  
吏部尚書熊賜履戶部右侍郎李枏都察院僉都御史

王九齡熊自癸丑至甲戌丁丑今庚辰凡四典禮聞向所未有也僉憲舊不列名聞自丁丑科始

唐樂府往往節取當時詩人之作率緣情切事可以意會理解然亦有不可解者如陸州歌第一分野中峯變乃節王右丞終南山詩後四句涼州歌第三開篋淚沾臆乃節高常侍歌詩前四句也不知與邊塞閨情何涉而取之

經筵講官例以尚書侍郎及內閣學士翰林院掌院學

士充大拜者則解講官惟徐崑山立齋

元文

以戶部入相

仍掌翰林院事兼經筵講官已卯十一月熊孝感青岳

賜履以吏書張桐城敦復

英

以禮書同日大拜皆帶經筵

講官蓋三臣在經筵最久故用異數非故事也

三月初一日午時

文華殿經筵滿講官吏部尚書庫勒納刑部尚書傅臘  
塔禮部右侍郎努赫刑部右侍郎常綬工部左侍郎羅  
察內閣學士兼禮部侍郎布泰翰林院掌院學士兼禮

部侍郎阿山漢講官東閣大學士兼吏部尚書熊賜履  
文華殿大學士兼禮部尚書張英吏部尚書陳廷敬戶  
部尚書李振裕禮部尚書杜臻刑部尚書王士禎禮部  
左侍郎王封濬大學士英尚書庫勒納講論語子以四  
教一節尚書廷敬侍郎阿山講禹貢禹敷土隨山刊木  
三句講畢

賜宴太和門

祝希哲書評云孟頫雖媚猶可言也其似箕子率俗書

不可言也王元美云李北海傷佻然自雅趙松雪稍穩然近俗又云承旨精工之內時有俗筆予謂松雪詩亦有法所患未能免俗耳

聞會試外簾諸公說二月某日貢院中忽聞小兒啼聲跡之在明遠樓上登樓視之果有一小兒如初生者卧而啼哭莫知所從來亦異事也

宋牧仲中丞寄所刻施注蘇文忠公詩集四十三卷宋司諫吳興施元之德初與吳郡顧禧景繁同撰元之

子宿字武子增補見陸游渭南集此書牧仲得之牧仲  
藏書家闕十二卷牧仲偕幕中文士某某共為得之始  
為完書

唐黃御史涵刻集八卷賦一卷詩三卷碑誌記序牋啟  
雜文四卷附錄一卷首有楊誠齋洪容齋二序淳熙四  
年渝州謝諤序唐藝文志云黃涵集十五卷又泉山秀  
句三十卷此集初名東家編畧宋紹興丙子尚書考功  
員外郎黃公度撰誌涵之八世孫也

江蘇巡撫宋華疏稱江寧縣故民林起龍妻黃氏內則克嫻婦道無忝于歸八十九載現年百有二歲所當題請旌揚以昭人瑞事下禮部

命翰林掌院學士法良韓莢教習庶吉士

以都察院左都御史王澤宏為禮部尚書擢戶部右侍郎李枏為左都御史副都御史王紳為戶部右侍郎順天府府尹甘國樞為副都御史

振武將軍涼州提督總兵官孫思克卒年七十四思克



旗下人鎮西陲三十八年兵畏民懷番獮戴之如父母  
王輔臣噶爾丹之亂兩次用兵恢復征勦累立大功  
本朝名將也屢以老病疏乞骸骨

上溫諭慰留不允至是卒奉

旨從優議恤贈太子少保加太子太保謚襄武

總督河道兵部尚書于成龍卒奉

旨從優議恤改江南江西總督兵部尚書張鵬翮為  
河道總督

徐昌國談藝錄云未睹釣天之美則北里為工不詠關  
雎之亂則桑中為雋當是既見空同之後深悔其吳歆  
耳而錢氏顧力揚其少作正弇州所云舞陽絳灌既貴  
後稱其屠狗吹簫以為佳事寧不泚頽者也

按此亦斥  
譏益語

石守道作怪論三篇毀楊文公予嘗駁之矣又讀其救  
說一首最諄于理如云漢祚微王莽篡道大壞揚雄存  
之五代之亂馮瀛王存之數語盡世道人心不淺而篇  
終又云天下國家有難患以死殉之忠臣之節

云何又

自相矛盾之甚守道持論率僻謬如此

南海舉人歐之麟貽其從世祖禎伯虞部集若干卷後  
附禎伯青衣李英詩曰歷遊集餐霞集當壚集又贈言  
一卷則徐子與沈蛟門文五峯諸人之作皆在子與極  
稱英咏月五言絕句云云予尤喜其臯蘭觀獵七言云白  
草黃沙羽獵齊將軍鏖戰馬頻嘶籌邊已斷匈奴臂百  
萬蒐田大夏西頗見格調顧氏國雅集登其人非過也  
唐詩人以畫名家者首薛稷王右丞次鄭虔顧況張志

和張諲劉商圖繪寶鑑云劉方平工山水樹石汧國公  
李勉甚重之又李林甫善山水類昭道昭道思訓之子  
林甫思誨子蓋從兄弟也世人知滕王元嬰善作蜂蝶  
不知嗣滕王湛然亦善畫花鳥蜂蝶官至太子詹事又  
吳越王錢鏐善墨竹

都察院同官題名

康熙三十七年七月予自戶部左  
侍郎遷都察院掌院左都御史

滿左都御史哈雅爾圖

由兵部右侍郎陞改包衣諸班  
三十八年十一月再補左都御

史

左都御史馬爾漢

由兵部左侍郎陞  
調補兵部尚書

左副都御史額倫特

由通政  
使陞

左副都御史壽鵠

由內閣  
學士改

漢左副都御史錢三錫

太倉人由宗人府丞  
陞遷戶部右侍郎卒

左副都御史金璽

旗人由宗人府丞  
陞遷偏沅巡撫

左副都御史吳涵

石門人由太僕寺卿  
陞遷工部右侍郎

左副都御史梅鎔

宣城人由宗人府  
丞陞遷福建巡撫

左副都御史王紳

睢州人由大理寺  
卿陞遷戶部侍郎

左僉都御史王紳

由大理寺少卿陞遷大理寺卿

左僉都御史王九齡

華亭人由少詹事陞遷內閣學士

刑部同官題名

康熙三十八年十一月予自左都御史調補刑部尚書

滿尚書傅臘塔

由左都御史調補

尚書安布祿

由左都御史調補

左侍郎綏色

由內閣學士陞

左侍郎蘇赫納

由內閣學士陞

右侍郎吳赫

由川陝總督調補改工部右侍郎尋革

右侍郎常綬

由工部左侍郎調補管右侍郎事

右侍郎舒輅

由工部侍郎調補

漢左侍郎徐潮

錢塘人由工部侍郎調補遷河南巡撫

右侍郎李輝祖

旗人由湖廣總督調補尋革

右侍郎喻成龍

旗人由兵部督捕侍郎調補添註尋題明即補李輝祖之缺遷安徽巡撫

左侍郎卞永譽

旗人由福建巡撫調補

右侍郎吳涵

石門人由工部侍郎調補遷吏部侍郎

右侍郎金璽

旗人由偏沅巡撫調補

畫家有兩李營丘北宋李成人皆知之南宋李永亦稱  
營丘知之者殊少太原王稗登云李營丘以山水擅名  
為宋畫院第一謂永也

三月二十日策試中式舉人王露等三百五人二十二  
日

上御太和殿臚傳第一甲第一名汪繹江南常熟人

丁丑

會試第  
三人

第二名李愈江南寶應人

庚辰會試  
第二人

第三名王

露

庚辰  
會元

二甲一名張成遇番禺人



長安薦福寺僧行義予遊秦時識之近謁普陀山歸見  
過云與雲水僧七人雨中炷香潮音洞虔禱願覩大士  
慈容倏見洞中現五色光光中有大士立像旁有白鸚  
鵡像莊嚴妙好是女人身他僧見者種種不一久之乃  
沒又云法華洞為大士演法處有老僧智玉居之年百  
有二十歲本明邊將也落伽山有老尼相傳百六七十  
歲獨居是山無伴侶弟子距普陀尚百里寺僧往致供  
給有見之者寺有玉印佩之可以辟邪已疾菽園雜記

以為普陀梵語白也落伽華也以山多山攀花故名本  
一山也

吳郡故孝廉徐昭法枋卒貧不能葬一日有武林高士  
某者來弔自任寔安然其人亦貧而特工分隸乃賃居  
郡中鬻書以庀葬具幅直一金吳人高其誼爭售之得  
數十金遂卜日以葬而以羨歸其子為饘粥費語之曰  
吾欲稱貸富人懼先生吐之故寧勞吾腕知先生所心  
許也惜不得其名氏

近于刑部案牘中又得數異姓薛獎蹤遠奉尋偃布職  
慈流力學貌稀又天順甲申進士直茂音陝英宗命改  
姓陝字

禮部考核各省學道奉

旨停止內陞著為例

近科鼎甲未有如癸丑之盛者狀元韓少宰莢榜眼王  
大司空鴻緒探花徐詹學秉義同時在

朝位三品上徐尋遷禮吏二部侍郎

鼎甲之衰未有如丁丑者庚辰春尚未解館而狀元李  
修撰蟠以科場事流徙奉天府安插探花姜編修宸英  
卒于非所榜眼嚴編修虞惇以子弟中式牽連降謫

裴秀冀州記云王儵捷為武陽人為柏人令于緱氏山  
登仙按今唐山縣即漢之柏人嶧嶧山在其城北故馬  
或贈韓定辭詩云別後嶧嶧山上望羨君時復見王儵  
後漢書王儵河東人顯宗時為葉令或云即古仙人王  
子儵

天上人予曾兩記之近觀田藝蘅留青日札云己卯曾  
都御史在南京見雲中二人冉冉直下僅相去七八尺  
信陽蔡夢官云己卯十一月二十五日自徐回潁川午  
後見天上西北白雲一條如路上行者七人有唐巾者  
科頭者長衣者兩截者手中各有所執亦有背負者往  
東南去可十里入山而滅見者六七十人予亦曾見三  
人一全體二半坐云

馮開之先生

夢

快雪堂集頗得禪悅山水之趣予少時

極喜之武林孝廉馮念祖字文子先生曾孫也執經于予一日請集序予問之曰初刻此集成僅摹印三十部板尋燬于火故流通絕少欲以頻年館穀所入重鑄之梓予嘉其志匆匆數年未有以報聊記于此

東坡居士在儋耳作十八大阿羅漢頌予最愛其二頌

第九尊者云飯食已畢撲鉢而坐童子若供發籥吹火我作

佛事淵乎妙哉空山無人水流花開

第十六尊者

云盆花浮

紅篆煙繚青無問無答如意自橫點瑟既希昭琴不鼓

此間有曲可歌可舞此頌真契拈花微笑之妙者又一

頌

第十五  
尊者

云薪水井臼老矣不能摧伏魔軍不戰而勝

得非自寓之詞耶

吾鄉益都孫文定公

廷銓

順治十八年以吏部尚書乞假

歸省途中作北曲

歸田

有句云閃煞人旌門畫戟虎頭牌

喜煞人神錢花鼓牛王廟又有北曲

白笈

云把一箇洛陽

街花攢錦簇美前程生扭做望江亭風清月冷喬丰韻

甚得元人遺意

古云太子處則監國出則撫軍撫軍二字乃儲貳之稱  
今人謂巡撫為撫軍沿襲之久莫知其非不典甚矣

浙之石門有語兒亭

國語曰  
梁兒

野史謂勾踐使范蠡獻西

施于夫差三年始達于吳至此亭生一子因名語兒亭  
夫當君臣卧薪嘗膽之日而范蠡乃以兒女子之情道  
路野合不忠甚矣何以為霸佐聲施至今且吳越相隔  
一江信使頻數三年始達勾踐豈土木偶耶乃聽其淹  
留鄰國置若罔聞俗語不實流為丹青可為喟喟



門人黃郎中元治字自先常兩官滇黔云浪穹縣平遠  
州皆有鳳凰山每至某月日輒有衆鳥千百其羣集于  
山上毛羽形狀多不可名按一統志浪穹山初名羅浮  
蒙氏細奴羅興時鳳翔于此改名鳳羽及鳳死每歲冬  
衆鳥哀弔其上故又名鳥弔山

董卓吳元濟黃巢三祠前記之矣近讀蕭山來元成集

之樵書

明崇禎庚辰進士其子  
燕雯今年庚辰進士

所載古今淫祠會稽舊

記秦始皇與大禹同廟王朗為會稽太守除之見三國

志注宋孝宗乾道四年加封楚州顯濟廟靈威王乃吳主孫皓祠以汪大猷等使北邊言其威靈故封又蔡人歲時祀吳元濟王質知蔡州毀之更祀狄仁傑李愬見宋史常山郡有董卓祠祠有栢樹魏蘭根盡伐以為櫛材見北齊書予按唐高常侍適有後漢賊臣董卓廟議云狄道之人不慙卓之不臣而務其為鬼則漢莽可得而神晉敦可得而廟桓溫父子可享于江鄉爾朱兄弟可祠於塞上云云則是卓祠常山狄道兩地皆有之矣

書又載杭州有秦檜祠朗州有梁松祠名陽山廟見譙  
言長語鄴有石虎廟見南史華容有朱太尉祠云是朱  
泚見耳談予按湖南祀泚事尤不經恐有訛誤又無為  
州有曹操廟和州亦有魏武祠見劉禹錫詩及一統志  
又澧州有驩兜廟石室存焉又某郡有盜跖廟

月之御曰望舒又曰纖阿又扶支國有望舒草紅色其  
葉如荷月出則舒月沒則卷或即所謂夜舒荷也二說  
不同

世說林公道王中郎

文度

云著膩顏恰愉布單衣挾左傳

逐鄭康成車後云云按魏造白恰橫縫其前後名之曰顏恰永嘉間稍去其縫名無顏恰也

四月初十日

命下丁丑科庶吉士徐樹本

故大學士元文子

等二十五人俱

授翰林院編修檢討朱啟昆等六人仍留館教習

己卯福建解元張遠字超然舊交也今為予門人翰林

檢討阿金工部主事潘鵬雲所取士言西山廣泉寺有

老僧不求食于人不出山者數十年矣日唯米如意草  
食之草不知所從來唯此僧種之其葉光澤而味甘美  
云聞諸馮補之補之名行賢常熟人亦交于予能詩工  
書予二十年前曾選定其詩云

康熙甲子潯陽西塘里人夜見田間有光遂掘土數尺  
得古銅器一具中貯大黃布刀百餘紅綠斑駁真漢時  
物其形製與宣和博古圖所載漢盃同今歸門人狄庶

常億

字立人

麋牀者後漢書冉駹夷出麋異物志麋似鹿角觸向前皮可作履襪角正四據南人因以為牀字書前西切音齊

四月改翰林院編修檢討為科道官馮雲驩湯右曾俱給事中彭始搏宋朝楠劉灝張瑗俱監察御史

本朝鼎甲之盛無如蘇州蘇州之盛又以長洲常熟二縣為最長洲狀元四人康熙丁未繆侍講彤癸丑韓少宰炎丙辰彭侍講定求乙丑陸侍講肯堂韓以下三人

又皆兼會狀兩元常熟狀元三人順治戊戌孫承恩康熙已未歸少詹允肅今科庚辰汪修撰繹他若湖州之德清兩狀元皆蔡氏康熙庚戌啟傳壬戌升元叔姪也又皆戊科大奇

江北數省鼎甲甚少惟直隸滄州二榜眼順治丙戌呂讀學纘祖乙未戴叅議王綸河南柘城一榜眼康熙甲辰李少司空元振一探花今科庚辰王編修露

吾鄉艾大司寇

元傲

為總憲時疏請禁言官風聞言事違

者降罰人或咎之近遂有疏請復風聞之例者然不知  
乃唐武氏所創非故事也唐史武后以術制羣下諫官  
御史得以風聞言事自御史大夫至監察御史皆得互  
相彈劾率以險詖相傾此風聞言事之始蓋羅織告密  
之別名耳偶讀東阿于文定公筆麈載此一則錄之當  
知請禁之非過而請復者之失考也

唐咸通五年彗星見長三尺司天奏以為含譽瑞星宣  
示中外近年彗星見粘給事中本盛亦上言以為含譽



星其言本此也抑暗合耶粘字質公閩人

本朝內閣各部院府寺皆設滿洲漢軍筆帖式主翻譯  
文書或七品或八品內而閣部外而督撫以下率自筆  
帖式起家于文定公筆麈載元朝丞相謂之大筆且齊  
蓋主文字之稱此猶謁者僕射之名始于秦而六朝以  
來遂為宰相之稱耳

秦置御史大夫以貳丞相漢沿其制丞相缺則御史大  
夫以次遷即今都察院左都御史也副都御史乃漢之

御史中丞今人不知多稱總憲為中丞殊可笑筆塵亦言之蓋自明已誤矣

海寧陸冰修嘉淑浙西名宿也康熙己未庚申間客京師每與宣城施愚山侍講梅耦長庚毘陵邵子湘長蘅夜過予邸舍劇談至三鼓始各散去陸有詩紀事云科跣到門衣不船船襟紐也或以杜子美飲中八仙歌天子呼來不上船亦作此解謬甚菽園雜記已言之矣

四月十六日

駕謁

孝陵視永定河工

從叔祖考功郎中季木

蒙春

常得寶刀映日光成五色吹

毛立斷上有十四字類蝌蚪文譯之云掃電流虹拜帝  
朝啟疆正號識長武裕州吳平子阿衡以四良馬易之  
吳官至總督薊遼都御史

戶部主事孔尚任東塘有龍卵聯句云燕市得一卵其  
堅如石圓尺有三寸鵝子形色類漬象牙徧體鰲點有

紋蟠結如蛟螭狀古云龍蛇卵有黼點蛇圓龍長龍卵經火不燬試之良然

天祿辟邪皆獸名一角曰天祿兩角曰辟邪總謂之桃被或琢玉肖其形陸文量菽園雜記載奉天門常朝御座後內官持一小扇金黃絹裹之名卓影辟邪永樂中外國所進但聞其名不知何物也

今諸衙門滿漢設官略同其同而異者如詹事府滿洲掌詹以下皆不兼翰林院銜左右春坊司經局銜上皆

冠以詹事府十三道監察御史皆冠以都察院而不分某某道是也

天下佛寺之名率用梵典予所經歷其名有新異者如蜀重慶府有相思寺青州府沂水縣有花之寺相思者以寺產相思竹得名花之二字不可解曹侍郎秋岳詩云月明蕭寺夢花之其長子在浚字雪客予門生也遂取二字以名其詞太好奇矣潛山道中有釣魚寺則因河上有釣魚臺而稱之未必是寺本名也

明初選進士為庶吉士分置近侍諸署若解縉為中書庶吉士是也右見菽園雜記予池北偶談嘗記六科庶吉士初未詳官制如何觀此乃曉然蓋中書六科皆近侍也

煙蘿子晉天福間人居王屋山佃陽臺宮田積功行一日于山中得異參闔家食之拔宅上昇今山有煙蘿子祠見李川父遊王屋山記

菽園雜記載蘇州志云崧菜北方種之一年半為蕪菁

二年菰種都絕猶橘之變于淮北云此說大謬今京師以安肅白菜為珍品其肥美香嫩南方士大夫以為渡江所無不知蘇志何據云然豈南北地氣遽反易有如此耶按先大父方伯贈司徒公羣芳譜蔬部云白菜一名菰燕趙維揚所種最肥大而厚一本有重十餘斤者益可證蘇志之妄

五月初一日

命九卿舉司道可內陞京卿者予舉湖廣武昌道叅議

莊搢搢江南武進人康熙庚戌科進士尋陞通叅莊亦不知為予所薦也

舊說江以南無蝗蝻近時始有之俗祀南宋劉漫塘宰為蝗神劉金壇人有專祠往祀之則蝗不為災俗呼莽將殊為不經按趙樞密蔡作漫塘集序稱其學術本伊雒文藝過漢唐不知身後何以矯誣如此亦如江湖間祀張睢陽作青面鬼之類也

山東巡撫王國昌題為援例陳請等事該臣看得奉文



行查端木謙閔煌是否先賢端木子閔子嫡派保送一  
案據布政使劉暄詳稱衍聖公孔毓圻咨併據兗州府  
覆稱閔煌端木謙俱係先賢後裔據濬縣以端木子墓  
祠載在縣誌其後裔端木謙春秋祭祀由來已久確係  
嫡派出結保送據濟寧州以閔煌自魯遷歙自歙遷濟  
世為主祀其兄閔煒修理祠墓招佃祭田有據今閔煌  
又以兄子閔衍籀乃係宗子請以衍籀承襲出結保送  
臣謹會同衍聖公臣孔毓圻合詞具題伏祈

敕部議覆施行奉

旨下九卿集議端木子七十代孫端木謙閔子六十七代孫閔衍籀俱准給世襲五經博士

予嘗謂時人好私其鄉人前輩而不顧天下後世之公議如秦人之於張尚書綵吳人之於陸尚書完楚人之於張相國居正是已然未有如艾南英之於嚴相嵩者閱其題弇州四部稿後論嘉靖事至以為才相英君千秋知遇雖誅戮稍稍過當云云如南英之言則楊忠愍夏

忠愍諸公之死皆宜而嵩不當與宋之惇布京檜同列  
奸臣傳矣南英負文名愚而諄乃至此不亦怪哉

五月初六日

御乾清門選庚辰科進士張成遇

廣東人二甲第一

等四十三

人為庶吉士

調陝西巡撫兵部侍郎蕪副都御史貝和訥為四川巡

撫以內閣學士兼禮部侍郎華顯為甘肅巡撫

四川巡撫于養

志革職甘肅巡

撫喀拜丁憂

黃山谷題畫云烈風偃草木客子當藏舟入浦溆中強  
人力牽挽欲何之耶數語見道之言極有味然蘇之貶  
惠貶儋黃之貶戎貶宜皆似未解此者何也豈亦能言  
之而不能行耶

康熙庚辰庶吉士李薛河南夏邑人其前身武進薛家  
諧孟也薛明崇禎進士官歸德知府有善政卒後人傳  
為歸德府城隍之神一日李叟夢神人戴冠章服至其  
家曰我薛某也上帝命為汝子寤而薛生因以名之仍

以諧孟為字

江鄰幾雜志載宋時一郊費六百萬後至一千餘萬今每歲南北郊

駕必親祭亦無冗費而昭事之誠通于神祇最得禮意不知宋時何以所費不訾乃爾

直省各巡撫共議裁官三百三十六員內直隸井陘道口北道二員山東青州道一員浙江金衢嚴道一員陝西神木道一員福建督糧道一員奉

旨口北神木二道仍留不裁允漢軍御史郭金城之請也

以禮部侍郎掌翰林院事阿山為江南江西總督改兵部右侍郎兼都察院副都御史

甘肅巡撫喀拜起復在任守制調華顯為陝西巡撫近代李贄稱武豐馮道足覘其心術古人亦有類此者如丁謂以曹操司馬懿為聖人夏竦美李林甫相業之類

江休復云宋審刑奏案貼黃更加撮白撮白上復有貼黃不知撮白是何許語

司馬溫公言王右丞詩崇梵僧初謂是僧名乃寺名近東阿覆釜村名見鄰幾雜志然覆釜自是山名司馬公不知何據

雜志云白水縣堯山掘得誌石是員半千墓云十八代祖凝本劉氏彭城人自梁入魏以其雅正似伍員遂賜姓員此說亦奇按半千全節人即吾郡之平陵故城也

何以葬白水未及考

康熙三十九年間北城民徐起龍有女嫁馮繼隆甫數日其姑曹氏淫悍婦人也引所私辛二僧宣召等逼姦之女不從則加炮烙畏而從之既兩月始許歸寧女泣訴父母起龍羞憤偕其表弟侯六登曹氏之門欲毆之曹及其姦夫辛二出禦遂鳴于官解赴刑部余適為尚書司諫訖呈堂以起龍兄弟白晝打擄草率結案余先已訪得其情實見有二人銀鐙繫頸問之云徐起龍侯



六余大怒碎其牘擲地詰滿漢司官曰汝曹畏勢乎徇  
情乎抑納賄乎如此爰書乃敢誑我天地神明其可欺  
耶立令釋二人銀鐺繫曹氏辛二之頸而令嚴提宣召  
到案辛二囊三木曹氏拶指皆吐實宣召至亦具伏遂  
按律定擬而斷女離異歸父母都人皆以為快庚辰五  
月事也

汪主事蛟門嘗謂淮南一士夫云家鮮詩書之氣門無  
貧賤之交其累世富貴宜矣


康熙三十八年青州議修葺府學青屬十四州縣分任之而總司于府學訓某某多侵漁木石久不訖工一日忽得狂疾搏顙大呼子路擊之跪拜祈哀號呼宛轉數日竟死

明永樂中忽有玉鵠十二枚從南飛來集天壽山後于其地卜長陵至德陵凡十二陵而止景帝別葬金山思宗則渴葬田妃墓而已

五月禮部尚書杜臻上疏乞休

溫音以原官致仕

時年六十七



居易錄卷三十二

欽定四庫全書

子部

居易錄卷三十三

詳校官侍讀臣陳崇本

員外郎臣牛稔文覆勘

總校官進士臣朱鈴

校對官中書臣方大川

膠錄監生臣徐瑤

欽定四庫全書

居易錄卷三十三

刑部尚書王士禎撰

六月十七日

御試翰詹諸臣于

暢春苑自正詹事徐秉義以下八十七人題為

萬壽無疆賦擬

御製仍以題中五字為韻秉義第一

賜宴又賜

御筆擢秀清流四大字少詹以下皆有賜惟不合式者滿漢二十人不與

定例凡旗人得罪其主主人以喫酒行兇呈部部不取供即移送戶部發黑龍江將軍分與新滿洲披甲之人為奴行之既久遂多冤抑一日滿主事索善審得某案非惟行兇無據即買契亦屬偽造斷出為民予深獎之遂堂諭十五司以後須詳究真情必有行兇實據乃坐不得朦混一槩行遣以防霸佔妻女等弊或有不悅者

不恤也

六月二十八日

特賜刑部尚書臣王士禎帶經堂

御書扁額令中官送大學士張英處轉頒臣寓二十九日五鼓赴

暢春苑謝

恩是日候補掌印給事中王原祁恭進元人畫二軸自畫山水軸二卷二素扇十柄賜



御書一幅先是

賜吏部尚書陳廷敬典翰堂額禮部尚書王澤宏夙夜  
惟寅左都御史李柟臺閣生風各四大字戶部尚書李  
振裕臨唐詩一幅

賜國子祭酒孫岳頌

御書筆端垂露四大字仍

命蘇州織造工部為置田宅異數也

棲霞楚雲禪師者名興源天界浪杖人之孫竺菴成公

法嗣也康熙癸酉曾訪予于京師庚辰自建昌之壽昌  
返棲霞復來京師過訪云將歸老南嶽且云居士大名  
今日歐蘇也吾住江西三年又嘗往閩中博山東苑二  
祖庭掃塔凡深山窮谷漁樵耕牧之徒無人不知居士  
名者此何故也予謝之云歐蘇之喻某不敢當然昔人  
相承叔云耳白于面名滿天下唇不掩齒動而得謗名  
亦隨之某生平涉世殆與此數語脗合似是本命干支  
合如此耳

庚辰六月總督河道尚書張鵬翮疏報海口疏通河流  
直下請建祠廟仍

賜名大通口

以內閣學士胡會恩為兵部右侍郎

兵部右侍郎  
嚴曾渠卒官

僉都

御史王九齡為內閣學士兼禮部侍郎

以太僕寺卿錢晉錫為順天府府尹

上諭翰林院官員內有甚貧者作何施恩并給假回籍  
不能來京者該地方督撫酌量料理送京之處內閣翰

林院會議具奏

唐人章八元題慈恩寺塔詩云迴梯暗踏如穿洞絕頂  
初攀似出籠俚鄙極矣乃元白激贊之不容口且曰不  
意嚴維出此弟子論詩至此亦一劫也盛唐諸大家有  
同登慈恩寺塔詩如杜工部云七星在北戶河漢聲西  
流又秦山忽破碎涇渭不可求俯視但一氣焉能辨皇  
州高常侍云秋風昨夜至秦塞多清曠千里何蒼蒼五  
陵鬱相望岑嘉州云下窺指高鳥俯聽聞驚風又秋色

從西來蒼然滿關中五陵北原上萬古青濛濛已上數  
公如大將旗鼓相當皆萬人敵視八元詩真鬼窟中作  
活計殆奴僕僮隸之不如矣元白豈未覩此耶

詹事兼侍讀學士徐秉義祭酒孫岳頌俱授禮部侍郎  
仍掌詹事府國子監事

順天府尹缺吏部列應陞正陪太僕寺卿錢晉錫光祿  
寺卿江繁名上令內閣傳

諭九卿各舉所知衆相顧未發予曰凡科道吏部及監

司內陞者皆經

皇上鑒拔其品其才

上所稔知九卿所舉未必能如

睿裁之真確翻恐挂一漏萬且如太僕光祿皆有職掌

事務煩劇今之府尹與古之京兆事體不同號為閒曹

未有可為太僕光祿列卿而不能勝京尹之任者也皆

聽予言遂罷舉仍以前二君及大四品左右通政大理

寺少卿名列上

上竟用錢為府尹而擢左通政勞之辨為太僕卿人皆服其至公

七月二十四日與諸公內直

賜御書唐詩湘竹金扇其一面畫人物山水花鳥臣得人物其詩乃主人能政訟庭閒云云末題臨董二字小御印引首曰中和後曰康熙宸翰

內大臣阿爾迪謚勤僖 康熙三十五年八月二十八日

浙江温州總兵官左都督一等阿達哈哈番

贈太子少保蔣懋勲謚襄僖 康熙三十六年二月初

四日

領侍衛內大臣議政大臣佐領蘇爾達謚恪僖 康熙

三十六年 閏月 日

鎮守杭州將軍一等阿達哈哈番札木陽謚敏恪 康

熙三十八年十月二十日

予嘗言詩小序授受有據而不可廢弋陽集傳臆斷而



不可憑適讀黃省曾五岳集孔子春秋序云欲聞京都之事者遠而四裔孰若中州中州孰若畿輔畿輔孰若左右之人今之人四裔類也漢氏諸名家中州類也戰國齊魯諸生畿輔類也左氏公穀左右類也三傳之旨後之人安得超駕企並之耶此喻極快明乎三傳則可知小序之不可廢矣

今京師臘月即賣牡丹梅花緋桃探春諸花皆貯暖室以火烘之所謂堂花又名唐花是也按漢書召信臣傳

信臣為少府大官園種冬生蔥韭菜茹覆以屋廡晝夜  
難蘊火待溫氣乃生唐人詩內園分得溫湯水二月中  
旬已進瓜蓋漢唐以來皆然

庚辰九月七日門人寧波府同知靳熊封治荆以公務  
入都貽予鈔本說部書數種有金元遺山續夷堅志舊  
所未睹也內記二事一曰劉太博機貞祐亂後遷濟州  
刺史時民居官舍皆被焚復立州宅掘地得古冢乃唐  
一行禪師墓有石記云劉機當破吾墓一曰石守道墓

在奉符太和中墓崩諸孫具棺葬骸骨獨其心如合兩  
手已化為石

又記二事云安常字順之從党承旨學大篆多識古文  
奇字太和末曾見內府所藏湯盤作白玉方斗近四寸  
底銘九字即德日新日日新又日新也又一方鼎耳二  
足四饗饗象在雷文中銘云魯公作文王尊彝瑩如碧  
玉無復銅性矣

庚辰七月六日夜三更後淮安洪澤湖大風雨雷電發

屋拔樹時督高堰堤工大臣如吏侍王顯菴揆戶侍田

蒙齋

雲王公垂紳諸公及分修督撫諸公皆在避匿岸

下土穴中質明望見空中十二龍鬬色皆青鱗鬣畢現

至七夕入夜始罷

九月有

旨河工責任宜專其差督河工兵部尚書范承勲等九

臣皆撤回京

十二日

車駕還宮有

旨停三十九年秋決其緩決矜疑者仍令具

奏

以下二條皆九月十五日

行取知縣止以河道總督張鵬翮直隸巡撫李光地保

薦者八人為科道官餘皆以部屬用

蘇縣知縣左必蕃良鄉傅作拊靈壽

李發甲滿城朱元春滋陽方永澄汾西靳讓善化梁仕南鄭魏壽期

上駕經寶坻欲

親臨奠故大學士杜立德墓其子刑部郎中某懇辭乃

御書永懷惟舊四大字

賜之

以少詹事曹鑑倫為內閣學士兼禮部侍郎

改刑部左侍郎徐潮為兵部右侍郎兼副都御史巡撫

河南

河南巡撫  
李國亮罷

以大理寺少卿王材任為都察院左僉都御史

禮部尚書  
澤宏

次子

二十二日辰時

文華殿經筵講官東閣大學士吏部尚書熊賜履文華  
殿大學士禮部尚書張英吏部尚書陳廷敬戶部尚書  
李振裕刑部尚書王士禎吏部右侍郎兼翰林院學士  
韓莢禮部左侍郎兼翰林院學士王封滌禮部右侍郎  
三寶刑部右侍郎常綬工部左侍郎羅察掌翰林院學  
士兼禮部侍郎法良侍大學士賜履侍郎常綬進講中  
庸仲尼祖述堯舜一節大學士英學士法良進講易恒  
卦聖人久於其道而天下化成一句講畢

賜宴

太和殿前

二十二日武會試揭榜會元周卜昌湖廣夔陵州人中  
式凡一百名

以前福建巡撫卞永譽為刑部右侍郎

喻成龍轉  
左侍郎

元遺山續夷堅志記平陽有賈叟者無目而能刻佛像  
交城一寺中佛是其所刻相好端嚴初立木胎先以手  
摸索之意有所會運斤如風又趙州瞽僧能喫墨作畫



上布五色亦喫之毛提舉家一虎蹲大樹下旁卧一青彪虎目爍爍如金望之毛髮森豎雖趙邈齷不能過也殆佛氏所謂六根互用者耶

德州馮舍人廷槐字大木予同年之子也中康熙壬戌進士詩名書法擅絕一時庚辰秋九月十六之夕尚與客談讌中夜忽中煤炭毒以卒質明僕輩始知之蓋京師煤炭皆有毒惟室中貯水盆盎中毒即解又續夷堅志云河中人趙才卿言煤炭熏人往往致死臨卧削蘆

服一片著火中即烟不能毒人如無蘆服之時預乾為  
末用之亦佳

阿魏散治骨蒸傳尸勞寒熱羸弱喘嗽方亦載續夷堅  
志阿魏三錢研青蒿一握細切向東桃枝一握細剉甘  
草如病人中指許大男左女右童便二升半先以童便  
隔夜浸藥明早煎一大升空心溫服服時分為三次次  
服調檳榔末三錢如人行十里許時再一服丈夫病用  
婦人煎婦人病丈夫煎合藥時忌孝子孕婦病人及腥

穢之物勿令雞犬見服藥後忌油膩濕麪諸冷硬食物  
服一二劑即吐出蟲或泄瀉更不須服餘藥若未吐利  
即當盡服之或吐或利出蟲皆如人髮馬尾之狀病即  
瘥人云此方得自神授隨手取效陵川進士劉俞字彬  
叔傳吐利後虛羸魂魄不安以茯苓湯補之白茯苓茯  
神各一錢人參三錢遠志去心三錢龍骨二錢防風二  
錢甘草三錢麥門冬去心四錢犀角五錢剉為末生乾  
地黄四錢大棗七枚水二大升煎作八分分三服溫下

如人行五里許時更一服謹避風寒若未安隔日再作一劑已上二方須連服之

又云治發背腦疽一切惡瘡初起時採獨科蒼耳一根連葉帶子細剉不見鐵器用砂鍋熬水二大碗熬及一碗如瘡在上飯後徐徐服吐出吐定再服以盡為度如瘡在下空心服瘡自破出膿以膏藥傅之京兆張伯玉榜示傳人後昆仲皆登第 又治一切惡瘡服瓜萐方懸萐一枚去皮用穰及子生薑四兩甘草二兩

橫紋者佳 細

切用白灰酒一碗煎及半濃服之煎時不見銅鐵患在  
上食後服在下空心服亦見續夷堅志又云張戶部林  
卿說有加大黃或木香或乳香沒藥者病瘡先疏利次  
用瓜萸方日以乳香紫豆粉溫下三五錢防毒氣入腹  
外以膏塗傅之自無不愈

十月初三日

皇太后六十大壽大學士尚書人進緞八疋侍郎學士  
副都御史通政使大理卿宗人府丞人進緞六疋止各

收其一諸親郡王進馬鞍皆珊瑚瑪瑙諸寶飾之璀璨奪目

初四日

太和殿試庚辰科武進士周卜昌等一百人士楨以刑部尚書與讀卷是晚閱卷六十初五日晨同部院啟

奏畢與大學士馬公熊公張公左都御史李公禮部右

侍郎李公錄等趨往紫光閣候

駕觀馬射

上登舟至行殿

御弓矢親射諸皇子宗室及侍衛以次射畢始試進士  
讀卷官侍坐終日試畢

上復

御弓矢如前射畢隨

駕入晚閱四十卷初六日啟

奏畢復趨

行殿候

駕觀步射

駕至

御弓矢如前射畢

上親選十三人既而止留八人至暮復

御弓矢隨

駕入即同諸臣賁

殿試卷至

乾清門



上秉燭御西暖閣

欽定第一甲三名二甲前五名以是科進士多嫻習騎射

特諭二甲取四十二名與三甲等異數也是日垂問臣士禎年齒科分甚悉又

命取西洋近視眼鏡令試之歸館已及二更初七日啟奏畢出至

太和殿前更朝服候臚傳一甲狀元馮會伯寧夏衛人

榜眼林澹江寧縣人探花朱士植靈州衛人二甲傳臚  
嚴廷訓寧夏衛人三甲傳臚章立幟錢唐縣人

偶得孫山人太白詩集六卷大名董復亨元仲刻本也  
集中載與費文憲公鷺湖倡和二詩又有約費閣老先  
生遊武夷山二絕句云他日移居溪水上衲衣同拜武  
夷君觀數詩則山人與文憲交契不薄小說記載恐非  
事實特欲重山人聲價耳

浙江巡撫張劬罷調福建巡撫張志棟為浙江巡撫

宋施宿字武子湖州長城人

今長興縣

紹興間為左司諫又

為淮東倉曹言路與有嫌欲劾之無以為罪宿嘗以其父所注坡詩鋟板倉司因據此事坐以贓私右見西吳里語按坡在湖為小人所譖興詩案之獄至高宗朝正蘇黃詩文大顯之日而小人猶能為祟如此又在湖州尤奇牧仲中丞近刻此注于吳下因錄緣起于後以備遺事云

十月二十四日

欽差督修河工兵部尚書范承勲工部尚書王鴻緒等  
九人回京

陞見

聲音積又音箋按字書人死為鬼鬼死為𪔐李石續博物志二廣之俗門畫虎頭書𪔐字謂陰司刀鬼名其說小異皆鬼所畏也又音你指物貌內典多用此字乃語助耳

人參類薺芄檜類栢木蘭類桂奚醯類檀蛇牀類藤蕪

見續博物志

燕避戊巳蝠伏庚申道書守庚申之說蓋取諸此漢設  
戊巳校尉于車師前王庭以制西域諸國則取鎮撫中  
央之義

博物志太子丹遁到關關門不開丹為雞鳴於是眾雞  
悉鳴是雞鳴出關不止一孟嘗矣紀載傳會失實可笑  
往往如此

以都察院左副都御史梅鎬為福建巡撫宗人府府丞

勵杜訥為副都御史詹事府少詹事王頊齡為宗人府  
府丞

德州城壁塹高深城門內起直城前障掩蔽內外左右  
馳道其尾相屬皆顏魯公制也右見王秋澗玉堂嘉話  
按唐德州今陵縣也

十一月調刑部侍郎喻成龍工部工部侍郎吳涵刑部  
偶得宣銅宮盤一中有凸起御製錦堂春詞一闕云映  
日穠花旖旎縈風細柳輕盈遊絲千尺重門靜金鴨午

烟清戲蝶渾如有意啼鶯還似多情遊人來往知多少  
歌吹散春聲宣德七年正月十五日背刻交龍中有內  
用二字

通鑑紀事本末宋刻大字有尚寶司卿柳莊表忠徹家  
藏印及陸子淵項子京諸印浙江人攜至京師索價百  
二十金留二日而還之

十一月十三日

上親祀南郊

十四日

駕謁

孝陵

御書賜河南巡撫徐潮曰撫四封福建巡撫梅鋗曰攄

誠信

徐以十月賜梅以十一月賜

以吏部右侍郎韓莢為禮部尚書仍兼掌翰林院事

禮部

尚書王澤宏致仕

禮部侍郎掌詹事府徐秉義為吏部右侍郎

仍兼掌詹事府事



元吳草廬集有毀曹操廟詩序云山南江北道憲司巡歷至夷陸毀冀牧曹操廟其議自書記申屠駟發之然則駟亦快士也唐肅亦有申屠子迪毀曹操廟文

十一月廿六日小集下侍郎令之齋中觀宋江貫道山水巨軸題曰山陰會真霅川江參作又王黻孟端小幅山水有自題一絕句云溪水涵秋鶴影孤草堂雲冷樹模糊相看未遂還山約空復年來寫畫圖又王汝玉王達善梁用行俞行之韓奕諸人題詩皆明初吳郡名勝

也入董思白宗伯臨黃鶴山樵一軸作崇山巨壑瀑布  
曲注而下山氣沉鬱不類文敏他作自題辛酉三月玄  
宰

都元敬鐵網珊瑚載逢澤湯允謨云宣和天水雙龍印  
有方圓二樣法書用圓名畫則用方又宣和明昌二帝  
題簋法書用墨名畫則用泥金鑒古者當知之

湯云見奇石子一色青大如鸞卵而形扁上有兜塵觀  
音像如圖畫磨洗愈見又張伯雨家有一劍背有字云

許旌陽斬蛇第三劍昔有漁者于江頭見雷公逐一小  
黃蛇化為此劍又唐王建親書宮詞二十首極婉麗後  
有錢武肅王印押又竹龜一以老竹片製首尾四足皆  
他竹外表者數小兩頭倍大可轉動背上負三截碑碑  
一面兩側有轉動亦是外表之竹首大腰小不知何故  
得入或云鬼工也又司馬文正公手錄富文忠公使北  
日鈔一卷字近古拙首尾端謹如一

李木菴總憲拊說湖廣提督林本直進鸞尾雲霧鳥二

物予詢之卞少司寇令之

永舉

云雲霧鳥出紅毛國有二

種其一五彩相錯如繡其一純白有山水文最可愛玩  
卞為閩撫時從海舶得二枚亦以進

上鸞尾略如孔雀而其目睛加密翅上皆有之不獨尾  
也又有金錢雞亦與鸞尾孔雀尾相類徧體有目睛金  
碧照耀時辰鳥大如雞黑身朱冠喙距皆赤十二時按  
節而鳴惟子午則鳴三通尤為靈慧也

十二月初十日

駕還宮

遣皇太子祭

孝陵

太皇太后權厝梓宮以歲暮也

湯允謨云識文夏用鳥跡篆商蟲魚篆周蟲魚大篆秦大小篆漢小篆隸書三國隸書晉宋以來皆楷書唐用楷隸三代同陰識謂之偃囊其字凹漢以來或用陽識其字凸間有凹者或用刀刻如鐫碑凡陽識決非三代

物

鐵網  
珊瑚

允謨又云有士人家藏十二時鐘能應時自鳴按此即  
今西洋所製自鳴鐘也殊不為異一紹興士夫家有異  
石峯趾有穴有水應潮自生嘉定間越帥以重價購得  
之

山虛水深萬籟蕭蕭古無人踪惟石嵯峨右古琴銘攬  
之幽然如水赴谷釋之蕭然如葉脫木右文與可琴銘  
二銘造語之妙不減蘇黃

宋英宗御書固齒及血衄方生地黄細辛白芷皂角各一兩去黑皮并子入瓶黃泥封固用炭火五六斤煨令炭盡入白僵蠶一分甘草二錢并為細末早晚用

予家舊物有十六應真圖董思白題為支仲元鐵網珊瑚云支仲元筆法師顧陸緊細有力每見高宗題作晉六朝高古名筆者多仲元作也

又云張敦禮汴人哲宗壻也善畫人物師六朝嘗見其陳元達鎖諫圖阮孚蠟屐圖并師顧陸

又云畢少董畫山水不在米芾之下

卞少司寇云司馬文正公資治通鑑手稿曾見一冊皆  
極端楷為好事者分去卞得其二三紙耳

頻年已來海內者舊零落欲盡今歲庚辰四月南海

梁炎佩蘭

樂亭

卒九月海鹽彭少宰羨門

孫通

卒十一月予

門人崑山盛珍示

符升

卒真有凋謝之歎

御史彭始搏仍為翰林檢討檢討劉琰

特改江寧府知府以其會試分校能守正故也



咸賓錄雲南姚安府產人參

庚辰臘月下浣六日同田綸霞少司徒雲吳容大少司

寇

涵

小集十少司寇令之

永

齋中觀畫略記其槩唐吳

道子維摩像殊不清癯而髮披至額如頭陀狀大乘山

比丘志恩題上方云被髮編蒲淨法身手持經卷現童

真法門不二無言說慙愧毘耶彼上人唐崔徽自寫真

題云崔徽病中寫真寄裴使君但不及卷中人矣此似

傳會為之上有東坡長句字頗佳唐曹霸人馬又郭熙

三松趙大年柳莊觀荷闕種

即

袁安卧雪大軸畫雪入

妙一人覆紺衣僵卧草堂中一人登柴柵窺之洛陽令

却騎徒行雪中一人執蓋其後寒態可掬餘從者四五

人蔽虧林間一一生動真奇作也高房山山水林木橋

道極分明但烟雲似南宮父子耳自題至治元年七月

高克恭周昉孟母斷機圖趙德齊瑤島會真圖嚴秋月

山水黃筌榴花黃鸝趙松雪山水自題至大二年秋九

月十日為進之作文徵仲臨松雪秋山訪隱自題嘉靖

壬子年八十有二唐伯虎良知圖為吳匏菴摹松雪自  
署壬午花朝詩不甚佳弗及錄圖中二人偶坐林下旁  
有童子及石鼎茗具之屬似是紀朱陸鵞湖之會但題  
作良知殊未雅馴又小幀元方方壺山水道徐賁幼文  
眠雲軒圖楊基孟載記書畫皆佳又有至正丙午秋八  
月渤海高啟字三子皆明初四傑中人也又燕文貴山  
水李昭道東華訪道圖李伯時王母獻桃圖人物衣裝  
皆着色金雷淵題詩并跋淵字希顏渾源人名載中州

集李伯時普賢洗象圖着色如新趙松雪寫天育驃騎  
歌上有松雪小篆杜詩延祐四年九月既望趙秋郊飲  
馬圖皇慶元年十一月有奎章閣學士院鑒書博士柯  
九思跋錢舜舉石勒問道圖太原王穉登六跋柯丹丘  
古木劉堪子興題云短日虛牕俯遠郊高林古木見寒  
梢春風一去支離久無復丹丘綵鳳巢元顧定之竹題  
晚節兩字贈恭道人明初馬治王達二跋鵲鵲圖至正  
庚子張子政作

祁陽浯溪山谷題中興頌碑後詩刻世謂之小磨厓與  
顏書並重順治初有縣令媚其上官乃磨去一角刻其  
詩過者驚惋予觀歐陽詹弔九江驛碑材文云美玉抵  
禽高冠藉足又云與有道而黥無罪而劓投四裔魑魅  
何以別耶石不能言其豈無冤吾反復其言而悲之先  
顏後黃其揆一也欲擬作一篇輒著于此

少司寇綏色公言昔使蕪湖道山中有地一區雪甚不  
積居人以畚鍤厠之及丈得土橫亘甚堅其形蜿蜒象

蛟螭而角鬣未完者急擊碎之云不碎之即成蛟變化去矣崩山汨壤殺人至無算土不含靈乃能為蛟異哉或曰蛟乃雉化雉與蛇交理宜有之又土石之怪曰夔罔象土將有怪物憑之耶

少司寇常綬公言康熙三十六年奉使西域經大宛國一山云是五百羅漢涅槃之所徧山之石皆如水精云羅漢骨所化

常又言寧夏衛城多平屋人行屋上者什六行衢路者

什四按廣雅屠廐平屋也

西域自土魯番以往兵力皆強勁惟哈密最弱明代吐魯番阿哈瑪特攻哈密據忠順王善巴金印蓋強弱之形自昔而然

宋九域志十卷總三十三路京府四次府十州二百四十二軍三十七監四縣一千二百三十五首京府郡軍名次所隸縣縣隸四京者分畿赤凡二等外郡者分望緊上中中下下凡六等止列地里戶口土貢餘皆不及

進表自謂文直事核顧太簡略矣承議郎知制誥丹陽  
縣開國子賜紫金魚袋王存國史院編修官奉議郎充  
集賢校理曾肇宣義郎輕車都尉李德芻同撰進蓋本  
唐十道圖宋九域圖而為之者康熙戊午奉

旨令翰詹諸臣修皇輿表倣史記年表之例代為一格  
橫書之惟詳歷代沿革名號他皆不及與此書互有詳  
略予時官侍讀分纂山東布政使司六府云

調蕭永藻為廣西巡撫彭鵬為廣東巡撫



以太常寺卿李鎰為通政使司通政使光祿寺卿江繁  
為太常寺卿

升菴集梁書檄文潛窺鴈鼎鴈鼎疑用戰國策顏率求  
鼎難事又或用柳下惠岑鼎事則鴈當作鴈按古鴈鴈  
字通用升菴深于字學何未考耶

小說載盧杞李林甫仙去固誕妄可笑然近世有遇徐  
庶者或云在終南或云峨眉成都費經虞有詩云傳聞  
徐元直尚在南山雲

王敬祖者寶坻諸生年十七失明常虔誦白衣觀音咒  
康熙己巳四月二十六日夜夢一婦人素衣澹妝手啟  
敬祖左目以小鉗鉗之出血筋長可寸許復啟右目鉗  
之其血筋亦出而中斷謂之曰爾目無恙矣質明視物  
瞭然惟右目微有所障自是合家持此咒不懈益虔盤  
山拙菴禪師智朴作王敬祖傳咒云南無佛南無法南  
無僧怛<sup>搭</sup>只哆多唵伽<sup>拉</sup>囉拉伐哆伽囉伐哆伽訶  
伐哆囉伽伐哆囉伽伐哆娑訶

宋末又有朱勔者小校也不屈于元死甚烈

曾子固曾通判吾州愛其山水賦詠最多鮑山鵲山華  
不注山皆有詩而于西湖尤惓惓焉如鵲山亭環波亭  
芍藥廳水香亭靜化堂仁風廳凝香齋北渚亭歷山堂  
樂源堂閱武堂下新渠舜泉趵突泉金絲泉北池郡樓  
郡齋皆有作及遷知襄州尤不能忘情離齊州後云千  
里相隨是明月水西亭上一般明又文犀剡剡穿林筍  
翠靨田田出水荷正是西湖消暑日却將離恨寄烟波

將家須向習池遊難忘西湖十頃秋從此七橋

明湖上有七橋

風與月夢魂長到木蘭舟荷氣夜涼生枕簟水聲秋醉  
入簾幃一帆千里空回首寂寞船牕祇自知西湖一曲

舞霓裳勸客花前白玉觴誰對七橋今夜月有情千里  
莫相忘按明湖一名濯纓一名蓮子今俗稱北湖而子  
固謂之西湖以在城中西北隅也當從之曾文有齊州  
北水門齊州二堂兩記

蘇子由官齊州亦有西湖諸詩環波亭云過盡綠荷橋

斷處忽逢朱檻水中央又北渚亭鵲山亭檻泉亭

疑此即

泉和李誠之燕別西湖西湖觀捕魚食雞頭踏藕凡八

九篇後又寄濟南守李公擇云岱陰皆平田濟南附山

麓山窮水泉見發越遍溪谷下田滿稷稻秋成比禾菽

池塘浸餘潤菱芡亦云足又云不知西城下滉漾千畝

綠仰見鷗鷺翻俯視龜魚浴其于吾州亦不薄矣蘇文

有滌原石橋閔子祠堂二記

李退菴侍郎敬

竹鎮記略云白龍王廟民賓某見一媼

持古鏡以斗米易之令鏡工磨治初磨見已像是牛再照乃是丐者三照始復本形怪而益磨之後竟無他又云鎮人熊申有一石如指大形扁光瑩如瑠璃中有兔銜靈芝轉側照之皆具體

特命翰林院侍讀汪灝提督山西學政初以翰林官出視學政惟直隸為然康熙二十闕年以浙江人文之數

亦用翰林他省仍舊其改用翰林則自此始

山西學道  
僉事于漢

翔休  
致

竹鎮有人病溺不下求于乩仙判云牛膝三錢車前子五錢同剉為麤末將來白水煎空心服之果愈

天啟辛酉秋六合巴山菴新造地藏忽左膝生花二朵三日如盃七日如盤高可盈尺色淺黃嫩白清芬襲人又云右脇下生蓮華一莖四十餘瓣如栗玉色逾月又生一莖縣人孫國枚記其事

宋文憲燕書有玉戲生與三烏叢臣約異時立朝勢人之門足勿涉也云云時趙宣子得君諸大夫日奔走其庭

三鳥叢臣雞初鳴即去候宣子入門見有危坐東榮者  
舉火照之則王戡生也各慙而退近有大臣出入權門  
者五更往候于廡下見有偃卧者迫視之亦某大臣也  
與王戡生之事正同

漢玉錢一枚題云王府布刀有趙松雪鐫蓋及贊蓋已  
損壞惟贊存末云延祐二年仲春良日翰林院集賢直  
學士趙孟頫贊門人狄庶常億得之吳中好事家



居易錄卷三十三